



Inatsisartuni ilaasortaq, Aqqaluaq B. Egede, Inuit Ataqatigiit

**Mittarfinnut pilersaarut pillugu § 37 naapertorlugu apeqquteqaammut 2018-170-
imut akissut**

22-08-2018
Sags nr.: 2018 - 15383
Dok. nr. 32518161

Asasara Aqqaluaq B. Egede

Inatsisartut suleriaasianni § 37 naapertorlugu apeqquteqaatinut nassiussannut qujanaq. Apeqqutit matuma kinguliani ataasiakkaarlugit allanneqarput, akissummillu malitseqarlutik.

Postboks 909
3900 Nuuk
Tlf.: (+299) 34 50 00
E-mail: box909@nanoq.gl
Fax: (+299) 34 63 56
www.naalakkersuisut.gl

**1. Qularnaveeqqusiinissaq pillugu aningaasaqarnermut Siunnersuisoqatigiit
inassuteqaataanut Naalakkersuisut isumaqataanerlutik?**

Akissut: Aningaasaqarnermut Siunnersuisoqatigiit 2018-imi maajimi allakkiamini qularnaveeqqusiinissamut inassuteqaaterpiamik saqqummiussimasutut taaneqarsinnaanngitsut Naalakkersuisut naliliipput. Aningaasaqarnermut Siunnersuisoqatigiit allakkiaa Naalakkersuisut imatut paasivaat, mittarfiit Namminersorlutik Oqartussanit 100 %-imik pigineqartussanngorlugit aqqissuunneqarnissaasa toqqarneqarata kingunerisaanik Nunap Karsiata suliani annaasaqaataasinnaasut 100 %-imik akisussaaffigissagai, taamatullu Nunap Karsiata sulianut atatillugu iluaqutissat 100 %-imik iluanaarutigissagai eqqumaffigeqquneqarmata.

Tamatumunnga atatillugu oqaatigineqassaaq, qularnaveeqqusiinissaq imminermini Kalaallit Airports A/S-imut qularnaveeqqusiissutitaqanngitsumik taarsigassarsititsinissamut sanilliullugu Nunap Karsianut artukkiinerususaanngimmat. Kalaallit Airports A/S-ip Namminersorlutik Oqartussanit 100 %-imik pigineqarnera tamatumunnga pequtaavoq, taamaalillunilu ingerlatseqatigiiffiup taarsigassarsiai suulluunniit Nunap Karsiata akiliisinnaassusianut tamarmiusumik tamakkiisumik artukkiisussaalluni. Taamaattumik misissueqqissaartoqarneratigut suliasat toqqarneqartut siunissamut qanittumut ungasissumullu missingersuutitigut aningaasaqarneq inuiaqatigiillu aningaasaqarnerat eqqarsaatigalugit iluanaarutigineqarsinnaalernissaannut naammattumik qulakkeerisinaanissaq pingaaruteqartussaavoq.

Taamaattumik Kalaallit Airports A/S-ip taarsigassarsititsisussani taarsigassarsinissamut pitsaanerpaanik periarfissaqarnissaa taamaallaat siunertaralugu Nunap Karsiata qularnaveeqqusiinissaa siunnersuutigineqarpoq.

**2. Mittarfinnut pilersaarummik aningaasalersuinermi qularnaveeqqutinik
piumasaqaateqanngitsunik aningaasalersuinissamut, aningaasaliisartunik
nassaarnissaq Kalaallit Airports qanga taamaatikkamikku?**

Akissut: Maannamut takussutissaasut takutippaat, qularnaveeqqusiineq erniat appasinnerulernerinik aammalu/imaluunniit taarsigassarsianut piumasaqaatit sakkukinnerulernerinik kinguneqartussaasoq. Kalaallit Airports A/S-ip aningaasalersuisussanik qularnaveeqqusiinissamik piumasaqaateqanngitsunik nassaarnissani sulii taamaatinngilaa. Kisiannili Naalakkersuisut isumaqarput, taarsigassarsinissamut piumasaqaatinik pitsaanerulersitsisoqarsinnaappat, Nunap Karsiata qularnaveeqqusiinnaanissaa pissusissamisuussasoq.

2018-imut Aningaasanut Inatsimmi kontomut pingaarnermut 10.13.11 Aktiaateqarluni ingerlatseqatigiiffinnut toqqaannartumik aningaasartuutit, oqaasertaliussaq normu 4 tunngavigalugu Naalakkersuisut Inatsisartut Aningaasaqarnermut Akileraartarnermullu Ataatsimiititaliaata siumoortumik akuersissuteqarneratigut, taarsigassarsianut 2,0 mia. koruunit tungaannut qularnaveeqqusiinissamut piginnaatinneqarput. Inatsisitigut tunngaviumi tassani Kalaallit Airports A/S-ip maanna aningaasanik taarsigassarsititsisarfinnik misissuinermini Nunap Karsiata taarsigassarsianut qularnaveeqqusiinnaaneranik niuerfinnut ilisimatitsisinnaanera periarfissinneqarpoq.

3. Aningaasaliisartunik ajutoortoqaratarsinnaaneranut akuersaarsinnaasunut Kalaallit Airports sulinerannut tunngatillugu Naalakkersuisut naammagisimaarinnippaat?

Akissut: Aap. Ingerlatseqatigiiffiup aqutsisui aqutsisut akisussaaffiinnut piginnaatitaaffiinullu ilagitillugu aningaasalersuisinnaasunik paasiniaanerminni sulilluarnerannut Naalakkersuisut tatiginnippat.

4. Namminersorlutik Oqartussat aktieselskabiutaat sorliit Namminersorlutik Oqartussanit taarsigassarsinissamut qularnaveeqquteqarnermut Naalakkersuisut paasissutissiissutigisinnaavaat?

Akissut: Namminersorlutik Oqartussat aktianik piginneqatigiiffiutaasa allat taarsigassarsiaannut qularnaveeqqusiisoqarsimanngilaq.

Neriuppunga qulaani allaqqasuni apeqquteqaatitit akineqartut .

Inussiarnersumik inuulluaqqusillunga


Simon Simonsen